

SHWBIZ KLIP

BON DÍA



Dos reconocemento special durante Festival di Tumba



Riba e anochi di Tumba manera t'e costumber e festival ta wordo dedica na figuranan cu tabata y ta hopi liga n'e festival. E exitoso festival aki a wordo dedica na dos figura importante den festival. Un di nan ta Nino (q.e.p.d) cu tabata un di e personanan masha yega n'e comision cu tabata bisa kico ta bon y malo como tambe señalá kico pa perfecciona. E tabata un persona clave di e festival cu semper a traha tras di cortina y cu nunca tabata gusta publicidad y asina el a keda semper banda di su famia cu ta uno masha liga musicalmente. Famia di Nino (q.e.p.d) tabata presente p'asina haya e reconocemento aki di e comision organisador y S.A.C. pa su colaboracion durante aña di e Festival di Tumba.

Otro di esnan cu a haya e honor aki ta la primerisimia y simpatica Sharon Rose cu tabata felis di a ricibi esaki y alabes riba e anochi aki a wordo menciona cu Sharon tabata e prome dama cu a competi den e festival di Tumba local kibrando asina e festival cu ta wordo domina pa hende homber. Sharon a haya cu e reconocemento for di man di e comision organisador y S.A.C. di cual e no por a wanta su alegria y a tuma e microfono canta riba e ritmo di Tumba parti di su tema cu el a participa den e festival. E publico a keda contento cu esaki y ambos reconocemento a cay den bon tera durante e festival. Despues di esaki tabata turno di e ultimo banda den contienda cu tabata Robert y su Solo Banda.